

- प्रधानमंत्री नरेंद्र मोदी कह्यो-देश रा स्टार्टअप री खुद रे पाण ऊबो भारत बणावण रा काम मांय खास भूमिका।
- केन्द्र सरकार नकली बीजां री बिक्री माथे आंकस लगावण सारु बीज बिल लावेला।
- राष्ट्रपति द्रौपदी मुर्मू आज एक दिन रा दौरा सारु जयपुर पधारी।
- सुप्रीम कोर्ट फैसलो दीनो-केवल रिजर्व लिस्ट मांय नाम व्हेवण ऊँ नौकरी रो हक नी मिले है।

0000

प्रधानमंत्री नरेन्द्र मोदी कह्यो है के स्टार्टअप इंडिया केवल दस साल मांय ई क्रांति बण गयो है। वे आज राष्ट्रीय स्टार्टअप दिवस रे मौके नई दिल्ली मांय राखी ज्या कार्यक्रम मांय बोल रहया हा। श्री मोदी कह्यो के भारत दुनिया रो तीजो मोटो स्टार्टअप तंत्र बण गयो है। वे कह्यो के भारत रा नौजवान वास्तविक परेशानियां ने सुलझावण माथे ध्यान देवे है।

....

श्री मोदी कह्यो के राष्ट्रीय स्टार्टअप दिवस रे मौके स्टार्टअप सुरु करण वाळा अर नुवी सोच ऊँ काम करण वाळां रो एके सागे भेळा व्हेवणो तेजी ऊँ विकास कर रहया नुवा भारत रो भविष्य बतावे है। श्री मोदी ई मौके प्रदर्शनी हलका रो दौरा कीनो अर प्रदर्शनी लगावण वाळां सागे बातचीत कीनी। ध्यानजोग है के स्टार्टअप इंडिया री सुरुआत दस साल पैली 16 जनवरी, 2016 मांय करी ज्यी ही। प्रदेश मांय ई ई मौके भांत-भांत रा कार्यक्रम राखी ज्या। पाली रा राजकीय बांगड़ कॉलेज रा स्टार्टअप सेंटर मांय विद्यार्थियां अर कारोबारियां सारु सेमिनार अर प्रदर्शनी राखी ज्यी। ई मौके जाणकार विद्यार्थियां ने स्टार्टअप सुरु करण री प्रक्रिया, सरकारी योजनावां अर सरकार कानी ऊँ माली मदद रा बारा मांय जाणकारी दीनी। विद्यार्थी ई सरकार कानी ऊँ स्टार्टअप ऊँ जुड़ी पहलां सारु धन्यवाद कीनो।

000

संसद रा आवता बजट सत्र मांय बीज बिल 2026 पेश कर्यो जावेला। केन्द्रीय कृषि अर किसान कल्याण मंत्री शिवराज सिंह चौहान आज नई दिल्ली मांय खबरनवीसां सागे आ जाणकारी दीनी। वे बतायो के ई बिल रो मकसद खराब क्वालिटी वाळा, नकली अर अनधिकृत बीज री बिक्री माथे रोक लगावणो है।

000

**विकसित भारत-जीरामजी कानून** रा बारा मांय आज जयपुर रा प्रदेश भाजपा मुख्यालय मांय कार्यशाला राखी ज्यी। इण मांय राज्य रा हर गांव -ढाणी ताई सुशासन अर जनता रा भला री योजनावां रो फायदो पूगावण ऊँ चर्चा करी ज्यी। ई सागे ई वी बी जीरामजी रा बारा मांय पैदा करी जा रही शंका आगी करण सारु ई विचार करी ज्यो।

कार्यशाला पूरी व्ह्यां पाछे खबरनवीसा सागे बातचीत करता थकां भारतीय जनता पार्टी रा राष्ट्रीय महामंत्री अरुण सिंह कह्यो के वीबी-जी रामजी कानून ने मनरेगा री खामियां दूर कर र और बेहतर बनायी ज्यो है। वे कह्यो के विपक्ष ई कानून रा बारा मांय भरमावण री कोशिश कर रह्यो है।

.....

कार्यशाला मांय मुख्यमंत्री भजनलाल शर्मा, भाजपा रा प्रदेश अध्यक्ष मदन राठौड़ अर पार्टी रा राष्ट्रीय महामंत्री अरुण सिंह ई मौजूद रहया।

000

मुख्य सचिव वी. श्रीनिवास कह्यो है के राजस्थान ने कपड़ा बणावण री देश री खास ठौड़ बणावण सारु केन्द्र अर राज्य सरकार मिल र काम कर रही है। मुख्य सचिव आज जयपुर मांय 'टेक्सटाइल इन राजस्थान' मुद्दा माथे राखी ज्यी मीटिंग मांय बोल रहया हा। वे कह्यो के ई हलका मांय निवेश ने बधावो देवण सारु राजस्थान टेक्सटाइल एण्ड अपैरल पॉलिसी-2025 लागू करी ज्यी है। वे बतायो के ई नीति मांय पहली दफा गारमेंट मैन्युफैक्चरिंग सेक्टर ने ई शामिल करी ज्यो है। मुख्य सचिव कह्यो के राजस्थान वन डिस्ट्रिक्ट वन प्रोडक्ट पॉलिसी रा तैत भीलवाड़ा, बालोतरा, कोटा, पाली अर बाड़मेर जिलां रा कपड़ा ने बधावो दियो जा रह्यो है।

000

राष्ट्रपति द्रौपदी मुर्मू आज जयपुर पधारी। वे शहर रा हरमाड़ा हलका मांय राखी ज्या एक धार्मिक कार्यक्रम मांय शामिल व्ही। श्रीमती मुर्मू जगद्गुरु स्वामी रामभद्राचार्य री अगुवाई मांय व्ह्या अनुष्ठान मांय विधि-विधान सागे आहुति दीनी। ई मौके राज्यपाल हरिभाऊ बागड़े अर मुख्यमंत्री भजनलाल शर्मा ई मौजूद रहया। कार्यक्रम पाछे राष्ट्रपति दिल्ली लौट गई।

0000

मुख्यमंत्री भजन लाल शर्मा कह्यो है के महिलावां री बरकत विकसित राजस्थान बणावण री मजबूत बुनियाद है। वे आज जयपुर मांय राजीविका ऊँ जुड़ी महिलावां सागे बजट ऊँ पैली री बातचीत रे दौरान बोल रहया हा। वे कह्यो के राज्य सरकार महिलावां ने माली तौर ऊँ खुद रे पाण ऊबी करण अर वां रो

पूरा विकास सारू लगातार काम कर रही है। श्री शर्मा कह्यो के मुलाकात रे दौरान मिल्या सुझाव राज्य रा आवता बजट ने समावेशी अर महिला केन्द्रित बणावण मांय घण मददगार साबित व्हेला।

000

सांख्यिकी अर कार्यक्रम क्रियान्वयन मंत्रालय खास आधार वर्ष मांय बदलाव माथे विचार कर रह्यो है। आकाशवाणी समाचार सागे खास बातचीत रे दौरान मंत्रालय रा सचिव सौरभ गर्ग बतायो के माली व्यवस्था रा हालात री जाणकारी सारू आधार वर्ष री जरूरत व्हे है। वे कह्यो के लारला दस साल मांय देश री माली व्यवस्था मांय खास बदलाव आया है। श्री गर्ग बतायो के अब आधार वर्ष 2011-12 ऊँ बदल र 2022-23 कर्यो जावेला।

000

सुप्रीम कोर्ट फैसलो दीनो है के केवल रिजर्व लिस्ट मांय नाम व्हेवण ऊँ उम्मीदवार ने नौकरी लागण रा हक नी मिले है। राजस्थान लोक सेवा आयोग रा मामला मांय सुणवाई करता थकां न्यायमूर्ति दीपांकर दत्ता अर न्यायमूर्ति ऑगस्टीन जॉर्ज मसीह री पीठ ई बारा मांय राजस्थान हाईकोर्ट रा लारला हुकम ने रद्द कर दिनो। अदालत व्यवस्था दीनी के भर्ती नियमां रे मुजब रिजर्व लिस्ट केवल 6 महीना ताई वैध रहवे है। सुप्रीम कोर्ट मान्यो के चयन प्रक्रिया ने बेमियादी बगत ताई चलावणो नुवा उम्मीदवारां रा मौका ने खत्म करणो व्हेला।

राजस्थान लोक सेवा आयोग कनिष्ठ विधि अधिकारी अर सहायक सांख्यिकी अधिकारी भर्ती मामला मांय हाईकोर्ट रा फैसला ने चुनौती दीनी ही।

000

जयपुर लिटरेचर फेस्टिवल 2026 रो आज दूजो दिन है। जयपुर मांय चाल रह्या ई साहित्यिक उत्सव मांय भारत अर दुनिया भर रा लेखक, विचारक, कलाकार अर साहित्य प्रेमी शामिल व्हे रह्या है।

000

राज्य मांय लारला 24 घंटां मांय पारो थोड़ो चढ़बा ऊँ सर्दी ऊँ थोड़ी साता मिली है। बीती रात केई ठौड़ां पारो चढ़्यो जद के आज दिन मांय ई पारो चढ़्यो। केई ठौड़ां दिन की बगत तापमान 25 डिग्री सेल्सियस ऊँ ऊंचो दर्ज करी ज्यो जद के चार ठौड़ां रात री बगत तापमान 5 ऊँ 9 डिग्री सेल्सियस बीचे मापी ज्यो। कठे-कठे घणी ठण्ड जद के राज्य रा उतराद हलकां मांय धुंअर रही। मौसम विभाग राज्य रा उतराद हलका मांय कठे-कठे बादळा मण्ड्या रेहवण रा आसार जताया है। महकमा रे मुजब आवता 48 घंटां मांय रात री बगत पारो 2 ऊँ 3 डिग्री सेल्सियस चढ़बा री संभावना है।

000

श्रीगंगानगर जिला मांय पाकिस्तान ऊँ लागती सरहद कने रा हलकां मांय रात री बगत कर्फ्यू लागू कर दियो ज्यो है। जिला कलेक्टर कानी ऊँ जारी हुकम रे मुजब सरहद कने रा तीन किलोमीटर हलका मांय सिंज्यां 7 ऊँ संवारे 6 बज्यां ताई आवण-जावण बंद रहवेला। हालांकि खेतां मांय पाणत सारू किसानां ने बी.एस.एफ. री मंजूरी लेवणी व्हेला। सवाईमाधोपुर रो 263वों स्थापना दिवस काल मनायो जावेला। ई सिलसिला मांय तीन दिन रा कार्यक्रम काल सारू व्हेला। म्हाणा खबरनवीस बतायो के समारोह री सुरूआत रणथंभौर रा किला रा त्रिनैत्र गणेश मन्दर मांय महाआरती सागे व्हेला।

0000

सलूंबर जिला री संस्कृति अर विरासत ने हेर र राखण रा मकसद ऊँ काल 'पंच गौरव महोत्सव' सारू व्हेला। अतिरिक्त जिला कलेक्टर दिनेश राय बतायो के दो दिन रा ई उत्सव मांय जनजातीय कला, हाथ री कारीगरी ऊँ बण्या सामान री प्रदर्शनी, जयसमंद झील मांय नावां री दौड़ अर सांस्कृतिक कार्यक्रम राख्या जावेला।

00000

प्रदेश रा राजस्व राज्य मंत्री विजय सिंह चौधरी आज डीडवाना-कुचामन जिला रा चितावा मांय घुमन्तू पिरवारां रा बच्चां ने स्कूल ड्रेस अर किताबां-कॉपियां बांटी। 18 विद्यार्थियां ने आधार कार्ड ई दिया ज्या।

000